



Komunikadu Imprensa

25 Juñu 2013

JSMP louva desizaun Tribunál Distritál Díli ba kazu omisídiu agravadu iha Hera

Iha 25 Juñu 2013, Tribunál Distritál Díli kondena arguidu ho inisiál MSA ho pena prizaun tinan 16 tanba komete krime omisídiu agravadu hasoru matebian, estudante UNDIL. Arguidu segundu ho inisiál ACC hetan absolvisaun ba alegasaun ofensa simples hasoru vítima.

Arguidu na'in rua (2) ne'e hanesan membru PNTL Komando Distritu Díli iha esquadra Becora. Kazu ne'e akontese iha 16 Jullu 2012, iha Hera, Distritu Dili.

“JSMP louva desizaun tribunál ba sira nia korazem atu kaer metin sira nia responsabilidade institusionál hodi garante justisa ba kazu ne'e, tanba durante julgamentu ba kazu ne'e hetan reasaun maka'as husi autóridade competente balun”, dehan Luis de Oliveira Sampaio, Diretór Ezekutivu JSMP.

Ministériu Públiku akuza arguidu MSA kontra artigu 139 kona-ba omisídiu agravadu konjugadu ho artigu 52 Kódigu Penál kona-ba sirkunstánsia agravantes jerál no akuza arguidu ACC kontra artigu 145 Kódigu Penál kona-ba ofensa ba integridade fizika simples.

Tribunál prova^[1]katak arguidu MSA mak tiru duni vítima momentu atua situasaun deskontroladu iha Hera, tanba vítima hamutuk ho nia grupu taka dalan, sunu roda, tuda kareta iha dalan públiku. Situasaun ne'e akontese tanba grupu balun deskontente ho rejultadu kongresu CNRT iha Centru Convenção Díli. Arguidu MSA tiru vítima iha momentu atu hakat sa'e ba iha kareta polísia hodi lori tun mai Díli. Tanba ne'e, tribunál konklui hodi kondena arguidu ho pena prizaun tinan 16.

Arguidu ACC hetan absolvisaun husi akuzasaun Ministériu Públiku nian ba krime ofensa simples ne'ebé nia natureza semi públiku ka vítima rasik ka ninia família mak tenki hato'ó keixa. Tanba vítima mate ona no família la keixa nune'e, Ministériu Públiku la iha lejítima atu akuza arguidu ne'e.

Akordaun ne'e prezide husi Juises koletivu, Dr. António Helder do Carmo, hanesan juis presidente, akompaña husi Dr. Júlio Gantes, no Dra. Jaçinta Correia. Ministériu Públiku representa husi Dr. José Landim no arguidu na'in rua akompañamentu husi Dr. Leonídio Marques (defensór estajiadu) husi Defensória Públiku.

^[1] Informasaun kona-ba deklarasaun sasin balun bele asesu iha iha website: www.jsmp.tl parte publikasaun : sumariu kazu Fulan Maiu 2013, kona-ba krime omisídiu agravadu, Nú. Prosesu 105/C.Ord/2012/TDD.

[1] Informasaun kona-ba deklarasaun sasin balun bele asesu iha iha website: www.jsmp.tl parte publikasaun : sumariu kazu Fulan Maiu 2013, kona-ba krime omisidiu agravadu, Nú. Prosesu 105/C.Ord/2012/TDD.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl